

EKALESIA FAAPOTOPOTOGA KERISIANO I AMERIKA SAMOA
OFISA O A'OA'OGA KERISIANO



VASEGA LAITI



AUKUSO - TESEMA

2021

FA'ASOLOGA O MATAUPU O LE TUSI

<u>ASO SA</u>	<u>MATAUPU</u>	<u>TUSI FAITAU</u>
1. AUKUSO 08, 2021	O Otineru le Fa'amasino	Fa'amasino 3: 8 – 11
2. AUKUSO 15, 2021	O Euta le Fa'amasino lona lua	Fa'amasino 3: 12 – 14
3. AUKUSO 22, 2021	O Tepora le Fa'amasino fafine	Fa'amasino 4: 14 – 16
4. AUKUSO 29, 2021	FESILI	
5. SETEMA 05, 2021	Fa'amanatu pea le o'o mai o le talalelei I Samoa I fanau. (ASO SA TALALELEI)	Mataio 28: 19
6. SETEMA 12, 2021	O le tamā e igoa ia Simeona	Luka 2: 22 – 35
7. SETEMA 19, 2021	O le tamā e igoa ia Iairo	Luka 8: 40 – 42, 49 – 56
8. SETEMA 26, 2021	FESILI	

OKETOPA 03, 2021 - OKETOPA 31, 2021 MALOLOGA MO LE LOTU TAMAITI

9. NOVEMA 07, 2021	O Sakaio le tagata ao lafoga	Luka 19: 1 – 10
10. NOVEMA 14, 2021	O Nikotemo I lona tulaga leoleo nanā	Ioane 7: 45 – 53
11. NOVEMA 21, 2021	O Paulo I le Ekalesia I Filipi	Filipi 1: 1 – 11
12. NOVEMA 28, 2021	O Filemoni	Filemoni 1: 1 – 25
13. TESEMA 05, 2021	Ua fanau Iesu	Luka 2: 1 – 7
14. TESEMA 12, 2021	Su'ega fa'ai'u o le tausaga	

**MANUIA LE KERISIMASI MA LE TAUSAGA FOU –
MANUIA LE TU'UAGA - FEILOA'I I LE 2022.**

ASO SA – AUKUSO 08, 2021

MATAUPU – “O OTINERU LE FA’AMASINO.”

TUSI FAITAU – FA’AMASINO 3: 8 – 11

SINI – Ia a’oa’oina ia malamalama tamaiti i le leaga o le ola agasala, ma le lavea’iina na faia e Otineru.

FESOASOANI MO LE MATAUPU –

O Otinielu o le fa’amasino muamua lea o Isaraelu ina ua fa’asolo le augā fa’amasino o le nu’u. O le taimi o le leaga o le nu’u ina ua fa’agalalo le Atua ae loto atu i mea leaga ma ifo i atua ‘ese, na tupu ai le to’asā o le Atua i ona tagata, ona avanoa ai loa lea o nu’u tuāo’i latou te sasa iā Isaraelu ma fa’atigāina. O le tupu o Mesopotamia e igoa iā Kusa - risa – tima, na muamua fa’atigāina Isaraelu, i lalo o lana ta’ita’iga. Na fa’atusaina e nisi tusitala le to’asā o le Atua iā Isaraelu, ua pei se afi lona mu saesae. Ua tapua’i i atua ‘ese ae fa’agalalo le Atua na latou osi feagaiga. Ua auauna atu iā Pa’ala ma Asaira. Ona o le leaga o Isaraelu, na saunia ai e le Atua le tupu o Kusa –risa-tima e fa’atigāina Isaraelu i le valu tausaga. O se taimi umi lea na pologa ai le nu’u o le Atua i lea foi tupu.

Peita’i, o le alofa o le Atua e lē liliu i le tagata e tumau lava. O le ala lea na toe liliu ane ai e lavea’iina ona tagata mai le pologa iā Kusa – risa-tima, e ala i le fa’amasino o Otinielu. O le fa’amasino lava o Otinielu, na ia fa’amalosi atu i le nu’u ina ia salamō ma tu’u ‘ese le leaga ma le agasala, ae foi atu i le Atua auā na te matuā fa’amagaloina i latou. Sa iā Otineru le agaga o le Alii na ia fesoasoani atu ai iā Isaraelu e tau ma Kusa- risa- tima, ma fa’aolaina ai i latou. O le latou alaga i le Alii ina ua pologa iā Kusa-risa- tima, na toe fa’atuina ai e le Atua le fa’amasino o Otineru e fai ma lavea’i mo i latou talu le valu tausaga na pologa ai. Ona filemū ai lea o Isaraelu i le fasefulu tausaga ona o Otinielu, ma o’o ina maliu ai o ia.

FA’ATINOGA O LE MATAUPU:

1. Fa’afeiloa’i ma fa’atalofa i tamaiti, ma fesili i ai pe ā mai le tu’uaga ma le malōlōga sa latou feagai, ae po’o fiafia foi e toe o atu i le aoga. Ona amata loa lea o le mataupu.
2. E fautuaina lava le fa’amanatu i fanau a latou api ma peni ina ia avatau i le aoga ma fa’amasani i le tusia i lalo o mea tāua o le aoga i lea Aso Sa ma lea Aso Sa, auā e mulimuli mai i le i’uga o le masina su’ega mo latou.
3. E fautuaina pea lau Susuga a le faiaoga ina ia lava lau mafutaga ma le tusi faitau ina ia mafai ona e fa’afaigofieina le tala i se gagana faigofie mo tamaiti. Ia manatua pea o le fesoasoani ua tu’uina atu e mo lau tapenaga, ae lē mo tamaiti.
4. E lelei foi ae fa’asolo lelei le fa’amatalaina o le tala, i le fa’agasologa o fuaiupu o lo’o i ai i le tusi faitau.
5. Ia fa’amamafa le faitau fa’amolemole, e lē afāina foi ae fa’aumiumi le faitauga Tusi Paia a tamaiti, ae fa’amamafa pea le mataupu i fuaiupu ua tu’uina atu.
6. E lelei foi ae saunia se siata e fa’amalamalama ai le mataupu, e faigofie ai ona maua e tamaiti, ae mulimuli pea i le fa’amatalaga o lo’o i ai i le tusi faitau.

IA A’OA’OINA IA TAULOTO IGOA IA:

1. KUSA – RISA –TIMA -----O le tupu o Mesopotamia, na faatigaina ia Isaraelu i tausaga e valu.
2. OTINERU----- O le fa’amasino muamua na lavea’iina Isaraelu mai le tupu o Kusa-risa-tima.
3. KINASA -----O le tamā o Otineru
4. KALEPO----- O le uso matua o Otineru

NAI FESILI E FA'AMAUTŪ AI LE MATAUPU

1. E fia tausaga na pologa ai Isaraelu i le tupu o Kusa-risa –tima? (**Tali:** 8)
2. O ai le malō na tupu ai Kura-risa-tima (**Tali:** O Mesopotamia)
3. O fea e tu ai Mesopotamia? (**Tali:** Sasa'e o Suria)
4. Aiseā na pologa ai Isaraelu iā Kusa- risa-tima? (**Tali:** Ua amiolega i luma o le Atua, galo le Atua)
5. O ai na toe fa'asaoina ma lavea'iina Isaraselu mai iā Kusa-risa- tima? (**Tali:** O Otineru le fa'amasino)
6. E fia tausaga na filemū ai Isaraelu iā Otineru ae maliu loa o ia? (**Tali:** 40 tausaga)
7. Fa'aopoopo pea e lau Susuga ni fesili faigofie e manatua gofie e tamaiti fa'amolemole.

A'O'A'OGA:

1. E leaga le amioleaga e lē fiafia ai le Atua.
2. Aua le fiafia e fa'amasani ma fa'auo i le leaga.
3. E alofa pea le Atua i le tagata pe ā salamō moni.
4. Fa'amolemole fa'aopoopo nisi a'oa'oga faigofie ona manatua e tamaiti.

PESE: Saunia e lau Susuga se pese maua uma e tamaiti, pe a'o foi se pese fou e te fatuina e fa'atatau i le mataupu, ona fa'ai'u lea o le aoga i lenei Aso Sa.

ASO SA – AUKUSO 15, 2021

MATAUPU – “O EUTA LE FA'AMASINO LONA LUA.”

TUSI FAITAU – FA'AMASINO 3: 12 – 14

SINI: Ia a'oa'oina ia malamalama tamaiti ua toe tofia foi e le Atua le isi ta'ita'i fou mo Isaraelu, ona ua toe amioleaga foi i le Atua.”

FESOASOANI MO LE MATAUPU-

Na lavea'iina Isaraelu mai le leaga o ā latou amio e Otineru le fa'amasino na tofia e le Atua, e tusa ai ma le tala i le Aso Sa ua te'a. Tamaiti, o le tala i le taeao lenei, o lea foi ua toe agasala ma amioleaga Isaraelu i luma o le Atua. Talofa e, i le alofa o le Atua, ae le umi se taimi e salamō ai, ae toe foi lava i le faia o le agasala. O le tala i le Aso Sa ua te'a, e na o Otineru na fa'atuina e le Atua e lavea'iina lona nu'u. Peita'i, o le tala i le Aso Sa lenei, o lea foi ua toe sui e le Atua le isi auala e sasa ma a'oa'oina ai lona nu'u agasala pea.

Ua fa'amalosia e le Atua Ekelona le tupu o Moapi e tau ma Isaraelu. Ae ua fesoasoani tele foi i ai ma Amoni ma Amaleka, na mafua ai ona manumalo Moapi i le taua. O se to'ilalo mata'utia lea o Isaraelu ona ua 'au'au fa'atasi malo e tolu e fa'atoilaloina i latou. Tamaiti, o le mea ua tupu, ua toe alalaga foi Isaraelu i le Atua ona o lo latou to'ilalo. Ioe, tamaiti, se mea lelei le fa'agalogo o le Atua pe ā maua manuia ma le sa'olotoga?

O le mea lava ia a'oa'oina ai i tatou uma tamaiti. E lē mavae le alofa o le Atua. Tigā lava na leaga Isaraelu ma fa'agalogo le alofa o le Atua, ae alofa pea le Atua i ona tagata. O iinei na tofia ai loa e le Atua le fa'amasino o Euta e ta'ita'i le nu'u o Isaraelu. Ona si'i taua lea o Euta ma ia fasiotia ai Ekelona le tupu o Moapi ona toe manumalo ai lea o Isaraelu. Tamaiti, e leaga tele le mea o le maua o le manuia ona galo lea o le tagata na maua ai le manuia. E fa'apea uma lava le nu'u o Isaraelu, ua latou filemu i le alofa o le Atua, na ala mai ia Otineru, a'o lea foi ua toe amioleaga ona ua galo le Atua le puna o le manuia. Na ona toe o'o mai lava o puapuaga, ona toe manatua

foi lea o le Atua. Tamaiti aua le fa'apenā outou. Ia outou manatua le Atua i taimi uma e manuia ai o outou olaga ma maua ai e outou le filemu moni.

FA'ATINOGA O LE MATAUPU:

1. E fautuaina pea lau tapenaga i le vaiaso, ia lava le mafutaga ma le tusi faitau, ma ia tapena lava ni mea faitino ma ni siata e faigofie ai mo le fanau a'o fa'amatala le tala.
2. E lelei pe ā fa'aaauau pea lau tapenaga i le fuaiupu e 31, e te manino atoa ai i le tala iā Euta ma le taua na feagai ma ia, ae fa'amamafa pea fuaiupu ua tu'uina atu, e fautuaina foi le faitau atoa e le fanau le 12 – 31, e a'o ai le faitauTusi Paia.
3. Ia fa'amatala lava le tala e pei ona aumai ai i le tusi faitau, ma ia manatua ia taumafai lava e feso'ota'i fa'atasi ma le tala i le Aso Sa ua mavae, ina ia iloa e tamaiti o lo'o gasolo lava le a'oa'oina i fa'amasino o Isaraelu e pei ona amata ai ina ia maua i le latou fa'alogo ma le a'oa'oina.
4. E lelei pea ae tulimata'ina foi le a'oa'oina i le leaga o le fiafia e fai le leaga i luma o le Atua, ae a fa'asaoina foi ona galo foi lea o le Atua. O se a'oa'oga tāua mo tamaiti ia amata ona totōina i o latou loto.
5. E te silafia foi nisi o tapenaga lelei mo tamaiti, fa'amolemole aua le taofia, ia matuā malamalama i latou ma taofi mau i ai.

NISI O IGOA E AO INA TAULOTO MA MANATUA:

1. Ekelona-----tupu o Moapi
2. A'ai o pama----- o le isi igoa o le nu'u o Ieriko. (E fa'apea le tala o le nu'u aupito ola ma tele ai le la'au o le pama)
3. Euta----- Atalii o Kira, o le ituaiga o sa Peniamina/fa'amasino lona lua o Isaraelu.

O NAI FESILI E FA'AMAUTŪ AI LE MATAUPU:

1. O ai na fesoasoani iā Ekelona ma lona malo i le taua ma Isaraelu. (**Tali:** Amoni ma Amaleka)
2. E fia tausaga na auuana ai Isaraelu ia Ekelona le tupu o Moapi? (**Tali:** 18 tausaga)
3. O ai foi Euta? (**Tali:** Atalii o Kira le sā Peniamina, fa'amasino lona lua o Isaraelu)
4. E fia tausaga na filemu ai Isaraelu ina ua manumalo Euta iā Ekelona? (**Tali:** 80 tausaga)
5. Fa'aopoopo e lau Susuga nisi fesili faigofie mo le fanau fa'amolemole.

A'OA'OGA:

1. E tele ma anoanoa'i a'oa'oga mai le tala. Peita'i, saunia pea laua Susuga i ni a'oa'oga aogā mo le fanau i o latou olaga tutupu a'e.
2. Ia fa'amamafa pea le leaga o le ola agasala ma amioleaga i luma o le silafaga a le Atua, auā e tauia mai lava e le Atua.
3. Aua le avea le alofa mutimutivale o le Atua ma ala e fiafia ai pea e fai le agasala, ia manatua e fanau, e i ai le taimi e to'asā ai le Atua, ma a'oa'i le tagata fa'alogogata iā te ia.
4. Aua le ola fa'alogogatā i matua.
5. Aua le maua manuia, galo loa le Atua.
6. Tu'u pea le avanoa e fa'ailoa ai ni a'oa'oga ua maua e le fanau pe afai e mafai, ae aua le fa'amalosia.

PESE: Saunia se pese e fa'auma ai le mataupu, ma fa'ai'u loa i se tatalo le aoga o lenei Aso Sa.

ASO SA – AUKUSO 22, 2021

MATAUPU – “O TEPORA LE FA’AMASINO FAFINE”

TUSI FAITAU – FA’AMASINO 4: 14 – 16

SINI: Ia a’oa’oina pea tamaiti ia manatua Fa’amasino na ta’ita’i i le nu’u o le Atua na lavea’iina ai i latou.

FESOASOANI MO LE MATAUPU:

Na toe foi le fanauga a Isaraelu i le amioleaga ma le ola agasala e pei lava ona masani mai ai i ā tatou tala ua tuana’i. O lo’o fa’agasolo pea le fa’amoemoe ina ia amata ona fa’amatala ma fa’ailoa i tamaiti nisi o tagata ma latou igoa i le Tusi Paia, a’o latou sao i le amataina o le nu’u o le Atua. Ua o se masani, ma ua pa’ua’i Isaraelu i lea amio, o le fiafia i le leaga pe ā manuia ma alofagia i latou e le Atua. Ae maua loa le manuia, ona toe foi lea i le fa’agalo o le Atua ma foliga mai ai ua le toe kea se tasi i le alofa fa’amaoni o le Atua. E fa’apea uma lava foi i tatou a tamaiti.? Ua toe o’o lava foi ina fa’alogogātātā tagata ma lē usiusita’i i le Atua, ina ua maua le filemu mai puapuaga. O le fa’afitauli tele lava lea o le nu’u o le Atua, o le maua o le manuia ma le filemu mai le Atua, ona galo lea o le alofa ma le agalelei o le Atua.

O lea foi la ua lē fa’alogo Isaraelu i le Atua ma ua fai lava le mea e loto i ai le tagata ia, ona fa’anoanoa foi lea o le Atua ma lē fiafia, auā foi o tagata o le nu’u o Isaraelu, o le fanau lea a le Atua. A ē fa’alogogātā i lou tamā ma lou tinā, o le ā le mea o le ā o’o iā i laua? Ia e fa’apen foi le lagona lē fiafia ma fa’anoanoa o le Atua i lana fanau o Isaraelu.

O le ala lea na ia saunia ai le nu’u o Kanana latou te sasaina Isaraelu se’i toe a’oa’i foi ona o le Atua e alofa i lana fanau. Ona latou salamō foi lea ma ‘aio’i i le Atua lo latou tamā ia lavea’iina i latou mai le sasa a Kanana. Ona silasila ifo lea o le Atua ua salamō lona nu’u i le leaga o lo latou lē usiusita’i ma tumau i fa’atonuga a le Atua mo lo latou ola manuia.

Ona saunia lea e le Atua ma ‘auina Tepora ma Parako e tau le taua ma Kanana ina ia lavea’iina ai lana fanau o Isaraelu. Ona fa’atonu lea e Tepora lana ta’ita’i ‘au o Parako e si’i le taua iā Kanana, o lo’o ta’ita’i mai e Sesera le ta’ita’i ‘au a Iāpino le tupu o Kanana. Ua fasi le taua ma ua sosola ‘au a Sesera a ua tuliloa pea e Parako ma ana ‘au ma fasiotia uma ai ‘au a Kanana ma feoti uma ai, ona mapu ma filemu ai foi lea o Isaraelu i le ta’ita’iga a Tepora le fa’amasino fafine na tofia e le Atua.

FA’ATINOGA O LE MATAUPU:

1. E fautuaina pea le lava o le lua mafutaga ma le tusi faitau, o le lelei saunia foi lea o lau Susuga mo le fa’amalamalamaina o le mataupu. E fautuaina pea le faitau o le mataupu atoa e lau Susuga, o le ā tele ai igoa e ao ina fa’ailoa i fanau ina ia amata ona fa’amasani i ai la latou fa’alogo.
2. Ia taumafai pea e fa’amautinoa i fanau le tāua o le alofa lavea’i o le Atua, na ala ai ona tofia fa’amasino e ta’ita’i le nu’u, e ui i le leaga o tagata ma agasala pea i luma o le Atua.
3. O taga tutusa lava tala e uiga i le galuega na tofia ai Fa’amasino, peitai e matuā tāua le a’oa’oina o fanau ina ia amata ona fa’alogo ma taumafai e manatua, i latou na tofia e le Atua i lea tulaga, ma mea na tutupu iā Isaraelu na mafua ai ona tofia i latou.
4. Mamatua, o le lua mafutaga lava ma le tusi faitau e ‘oa ai lau tapenaga o le vaiaso, pule pea lau Susuga pe fa’aaoga ni mea faitino pe fa’amatala sa’o foi, ae tautuanā ia faigofie i nai fanau ona malamalama ma taofi lau a’oa’o atu.

5. Pule lau Susuga i le tele o fuaiupu e faitau, e fa'aleleia atili ai le faitau a le fanau, ae tu'u pea lau fa'amamafa i fuaiupu ua tu'uina atu, ae t'ua foi lou silafia atoa o le mataupu e lautele ai lau tapenaga.

NISI O IGOA E AO INA TAULOTO MA MANATUA:

1. **Tepora** -----Fa'amasino lona tolu o Isaraelu, a'o le perofeta fafine foi. O lona to'alua o Lapitota. Sa nofo i lalo o le pama o Tepora i le va o Rama ma Peteli, i le mauga o Efaraima.
2. **Parako**----- O le atalii o Apinoamo mai Katesanafatali.
3. **Tapora**-----O le mauga na amata ai le taua a Isaraelu ma Kanana, i le va o Tepora ma Parako, ma le itu taua a Sesera ma I'apino le tupu o Kanana.
4. **Katesa**-----O le laueleele na fa'apotopoto ai e Parako lana autau e sefulu afe, e tau ma Sesera ma lana 'autau mai Kanana.
5. **Sepulona ma Nafatali** -----O ituaiga ia na fa'apotopoto e Parako mo le taua ma Kanana.
6. **Kaveru**-----O le s' Keni, o s' le fanau a Opapo, o le tam' lea o le av' a Mose, na vavae 'ese mai o ia i s' Keni.
7. **Sesera**-----O le ta'ita'i 'au a Kanana.
8. **I'apino**-----O le tupu o Kanana na fa'apologaina Isaraelu i taimi o Tepora le fa'amasino.
9. Fa'amolemoe lau Susuga a le faiaoga fa'aauau lau sailiiliga i le fa'ai'uga o le mataupu o le a tele ai nisi mea t'ua ma igoa foi e ao ina amata ona fa'ailo i le fa'alogo a le fanau. Ae fua lava e oe le tele ina ne'i l' maua e fanau, e mafai lava ona auaua'i.

NAI FESILI E FA'AMAUTU AI LE MATAUPU:

1. O le manatu lava ma le lagona moni o le vaega lenei o le mataupu, o le toe momoli lea o fesili e uiga i igoa o lo'o i luga ua uma ona fa'ailoa i fanau, ina ia maut' atili i o latou mafaufau.
2. Silasila foi lau Susuga i nisi fesili ua l' maua atu i le taumafaiga o le mataupu, ae o lo'o i le Tusi Paia lava le tali.

A'OA'OGA:

1. E l' 'ese'ese a'oa'oga o mataupu ua tuana'i ma lenei Aso Sa, e lelei pea le fa'amanino i fanau le tulaga lena.
2. Ae o lo fia tuliloa pea e lenei masina le amata ona a'oa'oina o fanau ia iloa tagata na fa'amasino i' Isaraelu, ma amata ona iloa tagata o le Tusi Paia i lea vaiata o le Tusi Paia, ma mea na o latou faia, a'o ai foi i latou.
3. Fa'aopoopo pea nisi a'oa'oga fou e te silafia fa'amolemole lau Susuga a le faiaoga, aua le taofia.

PESE: Filifili se pese mai le tatou Tusi Pese e amata ona fa'amasani ai foi i latou e fa'ai'u ai le mataupu, ona fa'ai'u lea i le tatalo a le Alii.

ASO SA – AUKUSO 29, 2021

MATAUPU – FESILI

SINI: Ia avea lenei a'oa'oga ma auala e toe fa'amanatu ai i fanau mataupu sa latou a'oa'oina i lenei masina, ina ia mautinoa e l' o fa'al' aog'aina lo outou tautig' i le galuega.

FESILI MO LE SUEGA-

O fesili o su'ega mo le fanau latii ia, ou te sōsō atu i le agaga maualalo, ina ia saunia lava e lau Susuga a le faiaoga au lava fesili e te silafia e tatau mo le fanau, i le malosi na o'o i ai le a'oa'oina o mataupu o lemei masina. Ou te taofi e sili atu lena i lo le avatu i'inei, ae lē talafeagai ma le tautigā na feagai ma ā outou Susuga i le a'oa'oina o si fanau. Pule lava foi oe i le faiga o le su'ega, pe auaua'i ane e te fesili i ai ae tali ane, ia pe saunia foi ni pepa fesili e tusi ai a latou tali.

FA'ATINOGA O LE MATAUPU.

1. O le ā tu'uina atu lava i lau Susuga le fa'afoeina o lenei fa'amoemoe.
2. E togi lava foi e lau Susuga le su'ega a tamaiti. E iā te oe foi le faitalia pe tali taito'atasi, pe tali tele, e mafai lava ona e maua ai i'ina se mea aogā ua maua e le fanau i lenei masina.
3. E lelei pe afai e ma'ea le su'ega, a'o lava le taimi ona toe fa'amanatu lea o tali o au fesili i le fanau ma fa'amalō i ai i lo latou taumafai.
4. O le ala lenā e tāua ai lava le fa'amanatu pea i fanau le 'api ma le peni ina ia tusi ai i lalo mea tāua e a'oa'oina ai i latou, e mafai ona e fa'amalosi i ai e toe su'esu'e i ai a'o lumana'i le le Aso Sa lenei.
5. E leai se tuā'o'i o mea lelei e fiafia ai fanau pe afai e maua ni nai fa'ailoga mo i latou, ae lē o se tulafono fa'amolemole, ua na o nai mafaufauga lava.

PESE: Manatua e fa'ai'u lava le aoga i se pese e saunia mo i latou, ma se tatalo e saunia e lau Susuga ua ma'ea lenei masina.

ASO SA – SETEMA 05, 2021 (Aso Sa Talalelei)

MATAUPU – FA'AMANATU PEA LE O'O MAI O LE TALALELEI I SAMOA I A TATOU FANAU” TUSI FAITAU: MATAIO 28:19

SINI: Ia a'oa'oina pea a tatou fanau i le talafa'asolopito o le o'o mai o le talalelei iā Iesu Keriso, i lo tatou atunu'u o samoa.

TAULOTO – MATAIO 28: 19 (Fa'amolemole afai e vave le a'o a lau vasega, ona fa'aopoopo lea le fuaiupu e 20 i le taulotu, ae afai e leai, ona taumafai lea na o le fuaiupu ua tu'uina atu -f:19)
“O lenei, ia outou o atu e fai nu'u uma lava ma so'o, ma papatiso atu iā te i latou i le suafa o le Tamā, ma le Atalii, ma le Agaga Paia.....”

FESOASOANI MO LE MATAUPU:

E lelei ae amata le mataupu i le fa'atalatalanoa o le fanau i ni uiga ta'atele ma masani o le upu talalelei ua latou fa'alogo ai, ae o le ā se lagona e maua e le tagata e fa'alogo i se tala e lelei. A ma'ea ona taumafai loa lea o lau Susuga a le faiaoga e fa'afeso'ota'i atu tala fiafia a le fanau i le talalelei iā Iesu Keriso. Le tala ua tatou tapua'i ai i le Atua Soifua.

O le tala i le taeao lenei tamaiti, o se tasi lenei o fetalaiga iloga a Iesu ina ua uma ona toetu a'e nai le oti. O lana fetalaiga po'o lana tala na fai atu ai i ona so'o, ia outou o atu e fai nu'u uma lava ma so'o, ma papatiso atu iā te i latou i le suafa o le Tamā ma le Atalii ma le Agaga Paia. O lona uiga tamaiti, o se tala lelei tele lea mo tagata uma, ā ea? E te manao e fai oe ma so'o o Iesu? O lona uiga o tagata uma lava e tatau ona avea ma so'o o Iesu, e lē na o se faifeau, po'o se tagata matua, po'o se tupu po'o se ā lava se tagata, ae taulia foi ma oe le tama ma le teine o le aoga aso sa. Ioe, e mafai foi ona avea oe ma so'o o Iesu, e te alu e tala'i i lau uo i le aoga, ta'u i lou

tamā ma lou tinā, le talalelei iā Iesu Keriso na maliu ma toetu, ua fa'amagalo ai a tatou agasala uma lava.

O le fa'atonuga lena a Iesu na fa'ataunu'uina e le 'au so'o, lea na mafua ai ona o'o i atunu'u uma lava o le lalolagi le talalelei, lea foi ua o'o mai i Samoa, e o'o mai i le taeao nei. Peita'i, e tatau ona iloa e tatou tamiti le ala na o'o mai ai le Talalelei i si o tatou atunu'u.

Tamaiti, o le ā fa'apu'upu'u atu le tala ina ia faigofie, fai mai le tala, o le tausaga 1830, na taunu'u mai ai muamua misionare mai Peretania e igoa ia Ioane Viliamu (John Williams) ma le au malaga, i le nu'u o Sapapalii i Savai'i, i Samoa. Na malaga mai i latou i le va'a e igoa o le savali o le filemu (Messenger of Peace). O le tala e fa'apea, e taunu'u Ioane Viliamu, fa'atoā uma lava le taua i Samoa, na oti ai le fili o tagata Samoa, le alii sauā e igoa iā Tamafaiga. Ona talia fialia ai loa lea e Malietoa Vainu'upo le savali o le talalelei iā Iesu Keriso, na aumai e papalagi, ae tu'u tu ma aga fa'apaupau a Samoa. Ona amata loa lea ona fa'asaga le atunu'u e a'oa'o le Tusi Paia ma fai lotu, ma ua tapua'i i le Atua o le lagi, ae lafoa'i atua fa'apaupau o Samoa, O se motu lenei o le pasefika na taliaina le lotu ma le talalelei iā Iesu i le filemu. Ua tatou maua ai le talalelei i le alofa tunoa o le Atua e ala iā Iesu Keriso lona alo na maliu ma toetu a'e nai le oti. O le taunu'uga lea o le fetalaiga a Iesu I ona soo, ia o atu e fai nuu uma ma soo ona o Iesu keriso, o le fa'aolataga lava lea a le Atua. O le talalelei silisili lea i talalelei uma o le lalolagi tamaiti ia aua ne'i galo iā te outou.

FAATINOGA O LE MATAUPU:

1. O lo'o i lau Susuga lava i le faiaoga le tomai e faigofie ai le fa'amatalaina o le mataupu i se gagana faigofie mo le fanau.
2. E fautuaina foi le aua le so'ona fa'amamfaina le talafasolopito i fanau ae amatai i mea faigofie e e pei ona taumafai atu ai, ae fa'aopoopo lava e lau Susuga pe ā talafeagai.
3. E tumau pea le fa'amoemoe i lau sailiiliga i le vaiaso o le ā mautū, ina ia maua le sini o le mataupu o lenei Aso Sa i lau tapenaga.
4. Manatua e tele pea talitonuga, ae sili lava ona auaua'i ma faigofie le vaega lea o le Ekalesi a i fanau, se'i matutua ma talafegai mo i latou ona a'oa'oina lea i le loloto o le talafa'asolopito o le Ekalesia, auā e tatau lava ona latou iloa.
5. O ni auala ma mea faitino e tatau mo lau mataupu, fa'amolemole aua le taofia lona fa'aaogaina mo nai fanau, fa'aopoopo pea mea sili ia mautū le mataupu i mafaufau ma loto o fanau i lenei aso.
6. Ia saunia ni fesili e fa'amautinoa ai le mataupu i fanau.

A'OA'OGA:

1. Ia fa'amalosi i tamaiti ina ia tauloto lelei le tauloto ua tu'uina atu, ina ia matutua ua lē toe galo.
2. Ia faamallosia i latou e a'o uma fuaiupu e 19 -20 ina ia maua lelei mo le Aso Sa o lumanai e amata ai le aoga.
3. Ta'u i tamaiti e aofia foi ma i latou i le upu so'o o Iesu i le tala'iina o le talalelei iā Iesu Keriso.
4. O le Talalelei iā Iesu Keriso , o le tala I le faaolataga ua magalo ai a tatou agasala, o le alofa tunoa lava lea o le Atua i le lalolagi o tagata uma lava.
5. Fa'aopoopo e lau Susuga nisi a'oa'oga faigofie mo le fanau fa'amolemole.

PESE: TUSI PESE #247. Fa'ai'u i se tatalo e saunia e lau Susuga a le faiaoga.

ASO SA – SETEMA - 12, 2021

MATAUPU – “O LE TAMĀ E IGOA IĀ SIMEONA”

TUSI FAITAU – LUKA 2: 22 - 35

SINI – Ia a’oa’oina tamaiti ia maitau ma manatua tala e uiga i le tagata o Simeona.

FESOASOANI MO LE MATAUPU:

Tamaiti o le tala o le ā ou fa’amatalaina atu, o le tala i le tamāloa e igoa iā Simeona. O lenei tamā o Simeona, fai mai o se tamā e ‘ese le talitonu i le Atua ma lona finagalo. O se tamā e usita’i i le mea e mana’o i ai le Atua. E tausī ma usūsita’i i tulafono a lutaia. E matuā talitonu lava Simeona, e i ai le Mesia e afio mai na te fa’aolaina Isaraelu. Tamaiti o le ā foi le uiga o le upu **Mesia. (Fa’aola mai)**. Ioe, lelei tele o le fa’aola mai, o Simeona la, sa talitonu ma lona fa’atuatua i le Atua, e i ai le aso e afio mai ai le Mesia po’o le fa’aola o Isaraelu. Ae o le mea manaia lava iā Simeona tamaiti, e lē gata ina talitonu ma fa’atuatua i le Atua, ae ua ia a’oa’o foi tagata ma fesoasoani i tagata matitiva ma fa’amafanafana i latou ina ia tumau o latou ala ma manatu i le Atua.

Tamaiti, na silafia lelei e le Atua uiga matagofie ia o Simeona, o lea na auina ifo ai le Agaga Paia o le Atua i ate ia ma fai I ai, e le mafai ona oti o ia, se’i va’ai ona mata i le fa’aolataga mai le Atua o lo’o ia fa’atali i ai ma lona fa’atuatua e taunu’u lava.

Ina ua fanau Iesu ma ua tupu a’e o ia, ua atoa le valu o aso, ona ave lea e ona matua i le malu-malu e fa’amamā iā te ia e tusa ma le tulafono a lutaia, ma osi le taulaga i le Alii. E avatu la Iesu i Ierusalem, o la e i ai le tamā lenei o Simeona i le malumalu, o lo’o nofo ai. Ona tago atu loa lea o Simeona ma si’i le tama i ona lima, ma fai atu i le Atua, Fa’afetai le Atua, ua va’ai ou mata i lau fa’aolataga. Sa fa’alogo i ai Iosefa ma Maria i upu ia a Simeona , ona la matuā ofo ai lea.

FA’ATINOGA O LE MATUAPU.

1. O le fautuaga masani lava i lau Susuga a le faiaoga, o lau feso’ota’iga ma le tusi faitau ma lou masani lelei ai, o le ā faigofiea ai lava lau galuega.
2. E fautuaina lava le a’oa’oina sa’o mai i le Tusi Paia le tala ae aua le fa’auigaina i le loloto, o le galuega lenā i le lumana’i pe ā matutua a’e i latou.
3. Fa’amasani i le gasologa o letala, ma fa’amalamalama nisi upu e lē mafai ona malamalama i ai i latou.
4. E mafai foi ona fa’aitno le vaega lea o le tala o lo’o ta’ua ai Simeona ma ana gaoioiga uma na fai.
5. Ia taumafai e fa’amautū upu a Simeona na fai i totonu o le tala ia lē toe galo i fanau.
6. Aua le taofia nisi faiga lelei e te silafia e ānoa ma maua ai e fanau le a’oa’oina lelei i lenei Aso Sa fa’amolemole

TAULOTO: LUKA 2: 29 -30

“Le Alii e, e te tu’uina atu nei lau auauna ia alu ma le manuia, pei o lau afioga, auā ua iloa e o’u mata lau fa’aolataga.”

A’OA’OGA:

1. Ia malamalama tamaiti i le tagata e igoa iā Simeona e pei ona i ai ile tusi faitau, ae ta’oto lona gafa e mulimuli mai i isi vasega.
2. Ia amio lelei pei o Simeona. Ia usūsita’i i le Atua pei o Simeona. Ia fa’atuatua i le Atua pei o Simeona.

3. Ma le tele o isi a'oa'oga tāua e maua mai lava i uiga matagofie o lenei tamā e tataua ona iloa e tamaiti.

PESE: Tusi Pese - #5, a'oa'o i tamiti ni fuaiupu, e tāua foi ona latou iloa pese ia, auā e aga'i lava i le o i aufaipese i latou. Fa'ai'u i le tatalo a le Alii le aoga i lenei aso.

ASO SA - SETEMA 19, 2021

MATAUPU - "O LE TAMĀ E IGOA IĀ IĀIRO"

TUSI FAITAU - LUKA 8:40 - 42, 49 - 56.

SINI - Ia a'oa'oina le fanau ia iloa lenei tamā o Iāiro e pei ona ta'ua i le tala

FESOASOANI MO LE MATAUPU:

Ina ua matua lava Iesu, ona amata loa lea ona fai o lana galuega alofa, o le fa'amalōlō o ma'i atoa ai ma le a'oa'o atu i tagata le talalelei i le malō o le Atua. Fai mai a'o femaliua'i solo Iesu i lana galuega mai le tasi a'ai i le isi nu'u, sa mulimuli iā te ia le motu o tagata e to'atele, i lo latou fia fa'alogologo i ana a'oa'oga ma matamata i vavega o lo'o faia e Iesu. Na fa'ate'ia Iesu ina ua alu atu iā te ia le tagata lenei o Iairo, ma fa'apaū faō i vae o Iesu, ma aio'i atu iā Iesu, ina se'i alofa atu i si ona afafine e to'atasi ua toetiiti oti. O Iairo tamaiti, o ia o le pule i le sunako po'o le malumalu (falesā), o lana galuega lea o le va'ai o le falesā.

Ona alu lea i ai o Iesu, e ui ina fa'alavelave ane pea le motu o tagata iā te ia. Fai mai le tala tamaiti, ua toetiiti lava o'o Iesu i le fale o Iairo, ae alu ane loa le tagata mai le fale o Iairo ma ta'u iā Iairo ua maliu po'o ua oti si ona afafine, ae aua le toe fa'alavelave iā Iesu po'o le a'oa'o o lo'o tele ana galuega o lo'o fai, ua leai se aogā ua oti le teine. Sa matuā tagi si tamā o Iairo, a ua fai atu Iesu aua e te tagi, ma aua le popole.

E taunu'u atu la Iesu i le fale o Iairo, oka! o lae e fai mai le lauaitu (fetagisiga). Ona fa'atonu lea e Iesu, e nā o Peteru, Iakopo ma Ioane ma mātua o le teine, (Iairo ma lona to'alua) latou te ulu atu i le fale. A ua atili ai le fetagisi, aemaise lava i le tinā ma si toeaina o Iairo. Aisea? Tamaiti, auā e pele fanau i loto o mātua.

Ua toe fetalai atu Iesu iā te ia, aua e te tagi, e lē o oti o ia, o lo'o moe. Ua o'o atu ia i le potu o lo'o ta'oto mai ai le teine, ona fetalai atu lea o ia, "Funa e, inā tula'i ia," Tamaiti, o le taimi lea ua matuā tete'i lava Iairo ma lona to'alua, i le va'ai atu ua toe ola mai si la tama. Ua matuā ofo lava i la'ua i le mea ua fai e Iesu, ae faa'pea foi i tagata uma sa i ai, peita'i ua vavao e Iesu i latou ina ia aua nei fa'aali atu i se tasi mea ua ia faia..

FA'ATINOGA O LE MATAUPU -

1. Ia fa'amatala le tala i le tulaga o lo'o fa'agasolo ai i le tusi faitau, e lelei foi ae fa'atino e le fanau ina ia mautū ma taofi gofie ai le mataupu i le tamā o Iairo ina ia lē toe galo i tamaiti.
2. Ia manatua pea aua le galo le faitauina o le Tusi Paia, ia fa'amamafa lava i le vasega lea. Fa'amlamalama ni upu e lē malamalama ai tamaiti. Fesoasoani lau Susuga a le faiaoga i le fa'asa'osa'oina o le fa'alēoga o upu ina ia sa'o le fa'aleoina.
3. E fautauina pea lau tapenaga i le vaiaso a'o le'i o'o i le Aso Sa o le mataupu, ia e malamalama i le tala, na faigofie ai lea ona fa'amatala i se auala faigofie i upu ma le gagana faigofie e talafeagai ma tamaiti.

4. O mea uma e te manatu e taofi gofie ai tamaiti i le mataupu ma mea faitino e fa'amatala ai le tala, fa'molemole aua le taofia.
5. Ia manuia tele lau tapenaga mo le Aso Sa.

Tauloto: LUKA 8: 50

“Ua fa’afofoga i ai Iesu, ona tali atu lea o ia iā te ia, ua fa’apea atu, aua e te fefe, tau ina e fa’atuatua, e ola ai o ia”

FESILI E FAAMAUTU AIA LE MATAUPU –

1. O ai na fai i ai Iesu i ana upu o lo’o ta’ua i le fuaiupu ua fai ma tauloto?
2. O ai tagata na fa’ataga e Iesu latou te o i totonu o le fale ina ua taunu’u Iesu i le fale o Iairo ?
3. O le ā le galuega a Iairo?
4. Fa’aopoopo e lau Susuga nisi fesili mai fuaiupu na faitauina, e malamalama ma taofi gofie e fanau.

A’O’AOGA-

1. Ia saunia e lau Susuga ni a’oa’oga mai le tala sa outou talanoaina mo nai fanau.
2. Ia fa’afaigofie a’oa’oga i nai fanau fa’amolemole.

PESE – Saunia e lau Susuga se pese mo lenei Aso Sa, ma fa’ai’u loa i se tatalo.,

ASO SA – SETEMA 26, 2021.

MATAUPU – FESILI

SINI: Ia toe a’oa’oina le fanau ina ia mautinoa o lo’o taofi mau i nisi o igoa ma tagata sa a’oa’oina i lenei masina ina ia aogā mo i latou i le aga’i atu i le lumana’i i le a’oa’oina o le Tusi Paia, ma ia manatua pea aua nei toe galo tala o le Tusi Paia.

FA’ATINOGA O LE MATAUPU:

1. E tumau pea le fa’atuatuaina ma lou talitonuina o lau Susuga i le faiaoga i le fa’atinoaga o le ga-
2. luega, o le ala lea ou te manatu ai o lo’o iā te oe lava le pule e fa’atino ai le galuega o lenei Aso Sa.
3. E pule pea lau Susuga i le fa’atinoga o fesili, pe tali gutu, ia pe saunia foi e lau Susuga ni pepa fesili e tali tusitusia ai le fanau, i le taimi e te fa’atulagaina lelei.
4. Manatua, e togi lava e lau Susuga le fa’amoemoe lea, o le ala foi lea ua manatu ai, e lelei pea ona saunia e lau Susuga, ina ia talafeagai lelei fesili ma lou gapātia na a’oa’oina ai.
5. O faiga masani lava, E lelei lava ae ma’ea ma toe fa’amlamalama i tamaiti tali o le su’ega, ina ia matuā taofi mau i o latou mafaufau ma manatua pea ia tala.
6. Aua le taofia nisi faiga lelei e te silafia e tatau mo fanau, auā le fa’amoemoe mo lo latou aga’i atu i luga i isi vasega.

A’OA’OGA ;

1. E leai se isi a’oa’oga tāua ma lelei mo lenei Aso Sa, ina ua mautino e lau Susuga a le faiaoga, ua mautū i fanau mea uma sa a’oa’oina ai i latou e ala i lo latou manatuina ma le mautinoa e lē toe galo, tala o lenei masina, nisi o tataga o le Tusi Paia ma o latou sao i le a’oa’oina o i tatou uma.

2. Ia fa'amautū foi a latou tauloto sa a'oa'oina, ma fa'amasani pea le faitau Tusi Paia aua lava le taofia.

PESE – E lelei ona toe fa'amanatu pese o le Tusi pese sa outou a'oa'oina i lenei masina, ina ia fa'amautū foi le vaega tāua lenā mo fanau. Fa'ai'u i se tatalo e saunia e se tamaita'i o le vasega.

ASO SA – OKETOPA 3, 2021 -----OKETOPA 31, 2021

MALOLOGA MO LE LOTU TAMAITI

ASO SA - NOVEMA 07, 2021

MATAUPU - "O SAKAIO LE TAGATA AO LAFOGA."

TUSI FAITAU – LUKA 19: 1 – 10

SINI- Ia a'oa'oina le fanau ina ia malamalama ma fa'amasani i le tagata e igoa iā Sakaio.

FESOASOANI MO LE MATAUPU –

Tamaiti, tou te manatuaina o le ā foi le la'au lea e tele lava i Ieriko, lea na tatou talanoa ai i le isi a tatou mataupu i le amataga o mataupu i le 'afa mulimuli lenei. Ia ai ua galo a? ioe, o le pa.....ma, o le pama. Ia o le tala la i le taeao lenei, fai mai le tala ua o'o atu Iesu i le nu'u lenei o Ieriko, po'o le nu'u o pama, sa i ai le isi tamāloa sa galue o le ao lafoga sili, o le tagata lea e igoa iā Sakaio, o se tagata e lē fiafia i ai tagata. E 'ino'ino i ai tagata ona e leaga lana amio, a alu e ao lafoga, e nofo fa'asili le aofa'i o tupe e totogi e tagata, ona tu'u lea o le tupu ua sili i lana taga mā ia, ae ave le aofa'i sa'o o le lafoga i le malō. O le ala lenā e 'ino'ino ma lē fiafia ai tagata i le tamāloa lenei o Sakaio.

Ua alu atu Iesu, ona tumutumu ane lea o tagata e fia matamata iā Iesu. A'o le fa'alavelave, ua lē iloa atu e le tagata lenei o Sakaio Iesu, ona o ia o se tagata pu'upu'u ma sa'asa'a tele.

E ui i lona fia va'ai ma fa'alogo i tala iā Iesu, ma vavega na ia faia i tagata mama'i, ae talofa e, i si tamāloa, ua pu'upu'u tele o ia, ua pupuni e tagata lana va'ai iā Iesu. O le ala lea na ia manatu ai o le ā a'e i luga o le la'au e igoa o le sukamoro se'i ona iloa atu ai Iesu. Ua a'e o ia, ma ua manino lelei lana va'ai i le aga'i ane o Iesu, peita'i, na te'i lava Sakaio ina ua fetalai ane Iesu iā te ia, Sakaio, alu ifo ia i lalo, auā e tatatu ona ou i ai i lou fale i le aso nei. Ona vave ane lea o Sakaio i laLo ma o loa ma Iesu i lona fale ma fai ai le lā mea'ai.

O le tala fiafia i le mafutaga lea ina ua fai ane Sakaio iā Iesu, "Fa'auta le Alii e, o le ā ou vaeluaina atu a'u mea i e matitiva, afai foi ua ou ave mea a se tasi i se ala pepelo, ou te tau ai e ta'ifā." O se fiafiaga mo Sakaio ina ua tali ane Iesu, Ua o'o mai le fa'aolataga i le aiga nei i le asō, ina ua fai o ia ma atalii o Apera'amo. Auā ua sau le atalii o le tagata e sa'ili ma fa'aola i lē na leiloa.

FA'ATINOGA O LE MATAUPU –

1. Faitau ia malamalama lelei i le fa'asologa o le tala ma fa'amalamalama i tamaiti, mai le amataga o le tala se'ia o'o i le fuaiupu na muta ia le tala. Fa'asolo mai le mea na tupu muamua se'ia o'o i le i'uga.

2. Fa'amalamalama ni upu e lē malanmalama ai tamaiti i se gagana faigofie, po'o upu faigofie e taofi gofie e tmaiti.
3. Ia fa'amamafa lava le tala i lona fa'amatalaina i le tusi faitau, ae aua lava nei fa'auiga ina i se loloto, amata i le silafia e tamaiti o le tagata e igoa iā Sakaio, ae ta'oto le loloto o le tala i le lumana'i.
4. O le tala masani, a'o le fa'amamafa lava o le mataupu, ia manino ma iloa e fanau le tagata o Sakaio mai le tala o lo'o fa'aaogaina, ia faigofie ona taofi e fanau.
5. Pule lava lau susuga i le faiga, ma mea faititino e fa'amalamalama atili ai le tala ina ia vave ona goto i mafaufau o tamaiti ma taofi mau i ai. Fa'aopoopo e lau Susuga nisi metotia talafeagai fa'amolemole.

TAULOTO – LUKA 19: 8 – 10

“A ua tu mai Sakaio ua fa’apea mai I le Alii, fa’auta le Alii e, o le ā ou vaeluaina atu a’u mea i e matitiva, afai foi ua ou ave mea a se tasi i se ala pepelo, ou te tau ai e ta’ifā. Ua fetalai ane Iesu iā te ia, ua o’o mai le fa’aolataga i le nei aiga i le asō, ina ua fai o ia ma atalii o Aperamo. Auā ua sau le atalii o le tagata e saili ma fa’aola i lē na leiloa.”

FESILI MO LE FA'AMALAMALAMAINA ATILI O LE MATAUPU.

1. Ia saunia pea e lau Susuga a le faiaoga ni fesili faigofie mai le tala ma lona a'oa'oina e fesiligia mulimuli ai le fanau. Ia mautinoa lava o lau tapenaga ma lona fa'amatalaina o le tala mai le tusi faitau, o le ā faigofie ona maua ai e tamaiti le uiga o ni fesi li e te fesiligia ai i latou.

A'OA'OGA-

1. Ia saunia foi e lau Susuga ni a'oa'oga faigofie e mafai ona tu'uina atu i tamaiti, inai a taofi mau i **ai ma manatua pea.**

Pese – E tele pese a le a’oga Aso Sa e fa’atatau iā Sakaio, pulse pea lau Susuga pe fa’aaoga se pese o le tusi pese. Ia fa’ai’u le aoga i se tatalo e saunia e se tama o le vasega.

ASO SA – NOVEMA 14, 2021

MATAUPU – “O NIKOTEMO I LONA TULAGA FA’ALEOLEO NANĀ.

TUSI FAITAU – IOANE 7: 45 – 53

SINI – Ia a’oa’oina tamaiti ia malamalama, ana leai Nikotemo, semanū e fasiotia lava Iesu e le fa’amasinoina”

FESOASOANI MO LE MATAUPU –

Ua o’o ina matuā vāvāo tagata lutaia atoa ai ma tagata mai isi nu’u, i lenei tagata o Iesu ma ana a’oa’oga ma vavega, Ua matuā tupu foi le poto o Iesu ua lē mafai e le atamai o tagata lutaia ona tali fesili ma a’oa’oga a Iesu, ae lē gata i lea, ua fiu foi e lamalama se mea e sesē ai Iesu se’i molia i le tulafono, ua lē mafai lava. O le mea lea tatou te iloa ai tamaiti, o Iesu na ‘auina mai e lona tamā oi le lagi, o ia o le Mesia e fa’atatau i tagata uma.

Ua ia folafola atu i tagat o ia o le Mesia, o le Alo o le Atua. Ua atili ai le lē fiafia ma le ita o tagata iā Iesu i lana fetalai lenā. Ua fai ane tagata, e tupu mai ea se Keriso i Kalilaia? Ua fai atu foi Iesu, e tupu mai le gafa o Tavita. O le to’atele foi o i latou, ua latou talitonu iā Iesu, ona vaeluaina lea o tagata lutaia. O nisi ua tete’e iā Iesu, a’o le isi vaega e ‘au iā Iesu.

O le vaega la lea na tete'e iā Iesu, o lo'o i ai ma Nikotemo, tamaiti, fa'alogo lelei, e lē fa'apea e 'au Nikotemo i le vaega tete'e iā Iesu, ona e ita iā Iesu, leai, na alu se'i fa'alogologo po'o ā tonu a le vaega leaga lea o le ā fai e lamalama ai Iesu e fasioti fua. Ioe , e fa'alogo atu Nikotemo, ua fai le tonu o le ā fasioti Iesu. Ona oso atu loa lea o Nikotemo ma fai atu iā Iutaia, , se aua le fasiotia fua o ia ae le'i fa'amasinoina, ave muamua e fa'amasino. O i'ina na toe 'au ai le to'atele iā Nikotemo ma fa'asaoina ai Iesu. A'o le isi vaega ua alalaga ane iā Nikotemo, o oe foi o le isi Kalilaia, e pei lava o lo'o e taumafai e lavea'i lenei tagata o Iesu, a ea?

Tamaiti, ana leai Nikotemo i lona tulaga fa'aleoleo nana (spy), e fasiotia lava Iesu ae le'i fa'amasinoina.

FA'ATINOGA O LE MATAUPU.

1. Ia mata'alia lau Susuga a le faiaoga i le mataupu o lenei taeao, e fautuaina le faitauina atoa o le tala, ae fa'amamafa pea le vaega ua tu'uina atu.
2. E lelei ona talatalanoa ma tamaiti i le galuega a le leoleo nanā po'o le spy, e faigofie ai ona malamalama le mataupu.
3. Ia malamalama le fanau e tāua le fa'aaoga sa'o o le tulaga spy, e fa'aola ai le isi tagata , ae lē o le spy e fa'atupu ai mea leaga ma misa i le va o tagata, ia pe fasiotia ai foi se tagata.
4. Afai e tele lau tapenaga, aua le taofia pe ā amata mai i sina tala po'o ai lenei tagata o Nikotemo, na o sina amataga faigofie (Silasila i le IOANE - 3: 1)
5. Saunia foi ni mea faaitino pe afai e mafai ona maua e fa'alautele ma malamalama gofie ai lau mataupu
6. Ia matuā fa'asaga ia mautinoa e maua le tauloto ua tu'uina atu, ma ia fa'amasani e tauloto pea i Aso Sa uma"
7. Ia saunia ni fesili e fa'amausali ai le mataupu i mafaufau o fanau.

TAULOTO: IOANE 3: 8

"E agi le matagi i le mea e loto i ai o ia, e te fa'alogo foi i lona agi, ae e te lē iloa le mea na sau ai, ma le mea e alu atu i ai, e fa'apea i latou uma o e ua fanau mai i le Agaga"

A'OA'OGA;

1. Ia saunia ni a'oa'oga faigofie ona taofi e fanau mai le tala o le nei Aso Sa.

PESE: Fatu sau pese e pepese ai fanau, ona fa'aiu loa lea i le tatalo a le Alii.

ASO SA – NOVEMA 21, 2021

MATAUPU – "O PAULO I LE EKALESIA I FILIPI"

TUSI FAITAU – FILIPI 1: 1 – 11

SINI- Ia a'oa'oina fanau i le tāua o le loto fa'afetai i le Atua, ina ua tupu le Talalelei iā Iesu Keriso.

FESOASOANI MO LE MATAUPU:

O Paulo, o le misionare o le talalelei a Iesu Keriso i nu'u 'ese. O ia o se tamā amio Atua. O se tagata foi ua mausalī lona fa'atuatua i le Atua, ae lē gata i lea, o lona talitonu ma le fa'amaoni iā Iesu Keriso. Sa tele malaga a Paulo na ta'amilo ai i nu'u latalata ma nu'u mamao 'ese ma Ierusalem, ona o le tala'iina o le talalelei.

O le tele foi o nu'u na ia afe i ai, e nofo ai mo ni nai masina po'o ni tausaga foi, ina ia taumafai e fa'atū se Ekalesia ina ia mausalī ma ola e tapua'i ai tagata i le Atua. O le tasi la lenei o nu'u sa i ai Paulo, o Filipi. Sa nofo ai Paulo i nai tausaga ma ia fa'atūina ai le Ekalesia i Filipi. Sa fai ana a'oga Tusi Paia, fa'amalamalama i tagata le talalelei a Iesu keriso. A'oa'o foi tagata i le alofa tunoa tele o le Atua na faia ai le fa'aolataga mo agasala a le lalolagi, e ala iā Iesu Keriso. O le soifuaga atoa o Iesu Keriso, fa'atasi ai ma ana a'oa'oga, sa ia ta'u ma a'oa'o atu ai i tagata, o le ala e tasi i le fa'aolaina ma manuia e fa'avavau.

E fa'apea le tala, na toe malaga 'ese mai Paulo ma aga'i atu i nisi o nu'u mamao e fa'aauauina le tala'iga o le talalelei, ma le mau iā Iesu Keriso, ma o'o ai ina falepuipui, ona o tagata Iutaia ua latou molia Paulo i le talitonuga e uiga iā Iesu o lo'o ia tala'iina. Manatua foi o tagata ia latou te lē talitonu i le toetu mai o Iesu Keriso. O i latou lava foi ia na matuā tutū malosi e molia Paulo i le falepuipui, auā e latou te lē talitonu i le toe tu mai o Iesu i le oti ma le tu'ugamau.

Peita'i, e fa'alogi mai Paulo i le falepuipui i tala ua avatu iā te ia e uiga i le Ekalesia i Filipi, ua matuā tupu ma ola le Ekalesia, ma ua matuā fiafia tagata uma, ua fa'asasaga i le Atua o le ola ma manuia e fa'avavau na tala'i i ai e Paulo. Ua latou faifai mea fa'atasi i le fealofani ma le olioli mai le Atua.

O le ala lea o le fa'afetai o Paulo i le Atua, ona o le Ekalesia i Filipi ma ona tagata, o le Atua lava sa fesoasoani iā Paulo i le fa'atūina o le Ekalesia. Ua tupu ma ola ma ua fua mai, ona o le Atua lava. O lana tusi apoapo'a'i la lea mo le Ekalesia i Filipi, ina ia tumau le fa'atuatua i le Atua, ma fa'amalolosi i le Ekalesia. Tamaiti, o se galuega ua lelei ma manuia e te faia, ia vi'ia ma fa'afoi i le Atua le fa'afetai, ae lē o le tagata.

FA'ATINOGA O LE MATAUPU:

1. Ia saunia lava lau Susuga mo le mataupu, e ala i le lua mafutaga ma le tusi faitau.
2. Ia fa'amalosi pea le a'oa'oina o le faitau Tusi Paia a le fanau, afai e mafai ona faitau atoa le mataupu mo le a'oa'oina o le faitau, ua lelei tele lea fa'afetai lava.
3. O le vaiaso lenei e aofia ai le aso fa'afetai, ia fa'amamafa pea i fanau le fa'afetai e 'ave i le Atua I mea uma ma le ola ua tatou maua.
4. Ia a'o ia maua le tauloto ma taumafai e fa'amanatu pea i Aso Sa uma fa'atasi ma isi tauloto ua uma ona a'oa'oina ina ia lē toe galo.
5. Ia saunia ni fesili faigofie e fa'amautū ai le mataupu i mafaufau o tamaiti.

TAULOTO: FILIPI 1: 3 - 5

"Ou te fa'afetai atu i lo'u Atua, i o'u manatu uma iā te outou, e lē aunoa la'u fa'atoga ma le fiafia, i a'u tatalo uma mo outou uma lava, ona o lō outou mafuta fa'atasi i lā le talalelei, talu mai le ulua'i aso, ua o'o mai i le aso nei"

A'OA'OGA:

1. E leai se tasi e sili atu ona malamalama i ni a'oa'oga o le mataupu, nai lo lau Susuga a le faiaoga na a'oa'oina le mataupu.
2. Fa'amolemole saunia ni a'oa'oga talafega ma faigofie mo nai fanau.

PESE: Saunia se pese fa'afetai mai le tusi pese e pepese ai tamaiti I lenei Aso Sa. Fa'ai'u i se tatalo e ta'ita'ina e lau Susuga, ae fa'ata'ita'i atu ai tamaiti.

ASO SA – NOVEMA 28, 2021

MATAUPU – “O FILEMONI”

TUSI FAITAU – FILEMONI 1: 1 – 25.

SINI - Ia iloa e le fanau le tagata o Filemoni.

FESOASOANI MO LE MATAUPU:

Ua o’o ina matua lava si toeaina o Paulo, ma o lo’o saisaitia pea i le falepuipui i Roma. Ae te’i ua fetau ai ma le tagata e igoa iā Onesemo. O Onesemo la tamaiti, o le tagata sa auauna ma avea ma pologa a le tagata la lenei o Filemoni o lo’o ‘autū i ai le tatou mataupu. Fa’alogo lelei tamaiti.

O Filemoni, sa feoa’i fa’atasi ma Paulo i le galuega o le tala’iina o le talalelei, o se tagata sa fesoasoani malosi iā Paulo i le galuiega a Keriso. O le ala lea o le masani lelei ai o Paulo iā Filemoni. O Onesemo la, sa nofo o ia iā Filemoni ma auauna ai iā te ia. Ae te’i ua sola ‘ese Onesemo mai le fale o Filemoni, ona o lona fefe iā Filemoni, ina ua lē totogiina lana aitalafu. O le mafua’aga lenā na sola ‘ese ai Onesemo mai le fale o Filemoni, ae fetau ai loa ma Paulo, ma o i’ina lava na liua ai loa Onesemo e avea ma tagata Kerisiano.

Sa manatu lava Paulo o le ā la nonofo ma Onesemo, peita’i, e lē fetau ma le galuega o le talalelei o lo’o ia faia, o le mea aupito sa’o o le toe fa’afoi ma fa’aailoa iā Filemoni le mea ua tupu, ina nei iloa mulimuli e Filemoni, ona fe’ese’esea’i lea, ma aua foi nei manatu Filemoni ua nanā e Paulo iā Onesemo na sola ese. Ae sili ai, o lona manatu o le auala lea e fa’aolaina ai Onesemo ma magalo ai, ma mamā uma ai i latou. O le ala lea o le tusi o Paulo iā Filemoni, ia alofa ma talia pea Onesemo i lona fale ma fa’amagalo iā te ia. Ia talia ma le alofa Onesemo, e lē o se pologa, a ia pei o sona uso moni.

FA’ATINOGA O LE MATAUPU:

1. O le lua mafutaga ma le tusi faitau e tāua lea auā e fesoasoani tele mo lau Susuga i le fa’amatalaina o le tala ma lona fa’amalamalamaina i nai tamaiti, ina ia lē faigatā.
2. Fa’amatala pea le tala i le fa’asologa o le tusi faitau ma sina fesoasoani ua tu’uina atu.
3. E malamalama lava le tala, fa’amolemole ia fa’amatala lemū ma faigofie i fanau, ia fa’aaoga foi ni nai fa’ata’ita’iga i le olaga o aso uma ma mea e tutupu e fa’amatala ai le tala lea.
4. Ia fa’amamafa le faitau Tusi Paia ma a’oina le tauloto ia maua ma fa’amantu pea i Aso Sa uma, fautua i tamaiti ina ia to’a’aga e a’oa’oina a latou tauloto pe ā o i le fale ina ia lē toe galo.
5. Ia sauni ni fesili e fesoasoani e fa’amautū ai le iloa e tamaiti o le tala ma taofi mau ai e lē toe galo.

TAULOTO: FILEMONI 1: 7, 14

“Auā lo’u uso e, ua tele lo’u fiafia ma le mafanafana ona o lo’u alofa, ina ua fa’amafanafanaina le ‘au paia ona o oe. (a’o e teine). A ou te lē fia faia se mea e tasi pe ā lē to maia sau pule, ina ne’i pei o se mea ua fa’atauana i lona agalelei mai, a ia faia ma le loto” (a’o e tama)

A’OA’OGA –

1. Ia toto'a lau silasila i ni a'oa'oga faigofie mai le tala mo nai fanau, o se tusi manino ma feso'ota'i lelei mo i tatou i le va'aiga i totonu o aiga, nu'u, aulotu ma le atunu'u ma so'o se tagata.
2. E pu'upu'u le tusi ae lē uma a'oa'oga fetau mo i tatou , ae amata ai foi ona a'oa'oina nai fanau.
3. Saunia pea e lau Susuga ni a'oa'oga i se auala faigofie, i ata ma le gagana faigofie fa'amolemole.

PESE: Tusi Pese #70. Fa'aiu i se tatalo e lau Susuga a le faiaoga.

ASO SA - TESEMA 05, 2021

MATAUPU - "UA FANAU MAI IESU"

TUSI FAITAU - LUKA - 2: 1 - 7

SINI - Ia a'oa'oina le fanau ia malamalama i le ala maulalo na fanau mai ai Iesu.

FESOASOANI MO LE MATAUPU -

Tamaiti, o ā foi mea mananaia o le ā tatou va'aia i lenei masina ua tatou i ai. (fa'afetai i ā latou tali ma amata loa le a'oga). Ioe o le Kerisimasi, o le fanau mai o Iesu lo tatou fa'aola, a'o le uo pele a tamaiti.

Tamaiti, e mana'o le faiaoga ina ia mautū ma aua ne'i toe galo iā outou le tala o lenei taeao, ia lē toe galo iā outou, le fa'atauva'a ma le maulalo o le ala na fanau mai ai Iesu, Talofa e, iā Iesu a ea tamaiti? Lelei ia fa'aolgo lelei aua le pisa.

O aso lava ia ua leva, na o'o mai ai le poloaiga a Kaisara Aukuso, ina ia tusia uma igoa o le lalolagi. Ona gasolo loa lea o tagata ina ia tusia o latou igoa e ta'itasi i lana lava a'ai po'o lona nu'u. O lona uiga e alu lava le tagata e tusi lona igoa i lona nu'u i le gafa o lona aiga.

Ua o Iosefa ma Maria i Petele'ema, o le a'ai lea o Tavita le tupu. Ua mafatia lava le faigamalaga, ma ua taunu'u atu ua fai si leva o le po. Peita'i, o le mea ua tupu, e taunu'u atu ua leai se avanoa i fale tali malō mo i laua, ua saili ma saili pea ua leai lava, ua te'ena lava i laua. Na te'ena i le faletalimalō mulimulli ane, ae fa'apea ane le pule o le faletalimalō, talofa e, ua toe o le fale o manu o lo'o maua ai le avanoa. Ae o le fale o lo'o momoe ai a'u povi ma a'u mamoe, ua na o si avanoa ititit o lo'o maua ai. Tali Iosefa, se ua lava lenā, tau lava o sina avanoa se'i mapu ane ai i ma'ua, ona o le tinā o lo'o ma'itaga, ma ua malūlū le po, ua vaivai i le mamao o le malaga. Ona mapu loa lea i le falemanu, Tamaiti, Talofa e, iā Iesu, auā o le po lava lenā i le falemanu, na fanau ai Maria i le pepe o Iesu. Matuā matagā ma maulalo, fa'atauva'a le nofoaga na fanau ai lo tatou fa'aola a ea? Amuia oe ma tatou uma e leai se isi na fanau i se fale manu a? na fananau uma tatou i falema'i, e 'ea malūlū, ofu fou, fagu susu ma apa susu, mea matagofie 'ese'ese pe ā fanau mai se pepe i ō tatou aiga a ea?

Ae Talofa e, iā Iesu, o luga o vaovao, ma povi na latou momoe fa'atasi, e leai ni teu fugāla'au, ma ni mea fe'ilafi i lona fanau mai, e lē o se falema'i 'ea malūlū, a'o le falemanu manogi leaga i manu, Talofa e, iā Iesu a tamaiti.

Peita'i, fai mai le tala na iloa e tupu mai sasa'e le fetu pupula uiga 'ese i le na po, ona latou mulimuli mai ai lea i le fetu po o le ā le mea ua tupu, ua 'ese ai lona pupula e lē masani ai. Na

mulimuli mai lava ma i'u ina taunu'u tonu i le mea o lo'o pupula mai ai le fetu ma latou maua ai le pepe o Iesu, i le falemanu ma ona matua o Iosefa ma Maria. Ua latou ifo ma talai a latou meaalofo mo le pepe i le fale o manau.

FA'ATINOGA O LE MATAUPU:

1. E lē fou le tala o le fanau mai o Iesu, e lē mafai foi ona suia le tala e pei ona i ai ma talitonuina, peita'i, ia taumafai lau Susuga a le faiaoga e fa'afaigofie le gagana, aemaise lava o le leo ina ia tosina mai loto o fanau ma lagona fa'atasi le sini o le mataupu i lenei taeao.
2. E lelei foi ae fa'atino le tala pe ā lava le taimi ina ia mausalī i o latou mafaufau ma manatua pea.
3. Fa'amamafa lava le sini o le mataupu i fanau, o le maulalo o le ala ia po'o le nofoaga na fanau mai ai Iesu le fa'aola o tagata uma. (O le falemanu)
4. Ia tautuana le tauloto ia fa'amamafa i fanau ia fiafia e a'o ina ia maua ma manatua pea aua le galo.
5. Ia fa'aauau le faitauga Tusi Paia a fanau, pule lau Susuga i le umi e fa'aaogaina i lea vaega.
6. Saunia ni nai feasili faigofie i se gagana faigofie e fa'amautū ai le mataupu i mafaufau o le fanau.

TAULOTO: LUKA 2: 7

“Ua fanau e ia lana tama ulumatua, ua ia aui iā te ia i le ie, ma fa'ata'oto iā te ia i le falemanu, auā latou te lē ofi i le fale e tali ai malō.”

A'OA'OGA:

1. Ta'oto atu i lau Susuga a le faiaoga ni a'oa'oga mo le fanau mai le tala o lenei Aso Sa.
2. E lelei foi pe ā fesili i ai i ni a'oa'oga ua latou mauaina a'o fa'amatala le mataupu e lau Susuga.
3. Ia tāua uma o latou manatu, aua nei fa'ale-aogāina se manatu o se tamaitiiti pe fa'asesē foi fa'amoolemole, ae fa'atonutonu e lau Susuga.

PESE: Usu se pese e iloa uma o le kerisimasi, ma fa'ai'u i se tatalo e saunia e lau Susuga.

ASO SA – TESEMA 12, 2021

MATAUPU – SU'EGA FA'AI'U O LE TAUSAGA

SINI: Ia toe polili i fanau le galuega o lenei tausaga, ina ia mautinoa ua taofi i ō latou mafaufau mataupu sa a'oa'oina, ia lē toe galo.

FA'ATINOGA O LE MATAUPU:

1. E leai se fa'amoemoe o le su'ega e sailia ai po'o ai e sili a'o ai e uliva'a, leai, o le toe fa'amalosia ma ia mautinoa e lē o fa'aleaogāina lo outou tautigā i le galuega.
2. O le ā saunia lava e lau Susuga le su'ega ma togi
3. E pule lava lau Susuga i le faiga, pe taligutu, ia pe tali i le pepa pe afai e mafai ona tusitusi fanau.

4. E fautuaina foi, ia saili i lea su'ega po'o ai tamaiti o lo'o manatua pea a latou tauloto sa a'oa'oina i lenei tausaga, o se oso lelei lea mo i latou ma lau Susuga auā ua maua se mea aogā i le aoga i le nei tausaga.
5. Ia i ai foi se vaega o le su'ega e toe siaki ai la latou faitau Tusi Paia, a ia sui ni tusi ma mataupu e faitauina, ae fa'alogologo ma silasila lau Susuga, e te silafia lelei ai, pe aga'i i luma pe alu i tua.
6. E lelei pe afai e maua ni nai fa'ailoga mo nai tamaiti, ae lē fa'amalosia i sa matou tala, e pule lava outou. Ae fai atu ai foi.
7. A lava le taimi ona toe fa'ailoa lea o tali o fesili e fiafia ai latou ma iloa ai o latou togi ua maua.
8. Nisi faiga talafeagai, fa'amolemole aua le taofia, a ia mautinoa e mo le manuia o nai fanau.

FA'AALIGA TĀUA

O LE ASO SA LENEI E MA'EA AI A'OGA O LENEI TAUSAGA, MA AMATA AI LOA TAPENAGA A FANAU MO LE ALO ATU I LE KERISIMASI MA LE TAUSAGA FOU.

PESE: IA TAUALUGA LENEI ASO SA I NI PESEPESEGA O LE KERISIMASI UA ILOA E FANAU MA AMATA ATU AI A OUTOU TAPENAGA. Faaii loa I se tatalo e saunia e lau susuga e talosia ai le tuuaga.

**MALO LE GALULUE! MALO LE ONOSA'I I LE FAIVA FA'A-FAIAOGA ASO SA!
FAAMANUIA TELE LE ATUA!**

MANUIA LE KERISIMASI MA LE TAUSAGA FOU 2022!